

Mid-Day Dogri News Bulletin, 01st July 2025

समे – 12:25

<><><><><><>

Digital India

डिजिटल इंडिया प्रोग्राम दे 10 ब'रे पूरे होई गे न। एहदी शुरुआत प्रधानमंत्री नरेन्द्र मोदी होरें 2015 च कीती ही। एहदा मकसद हा इक नागरिक दे जीवन गी सखल्ला ते सरल बनाना ऐ। प्रधानमंत्री होरें आखेआ जे भारत नै इक सौ 40 करोड़ देशवासिएं दे सामूहिक संकल्प कन्नै डिजिटल भुगतान क्षेत्र च महत्वपूर्ण उपलब्धी हासल कीती ऐ। सोशल मीडिया दी इक पोस्ट च उनें आखेआ जे डिजिटल इंडिया अभियान दे 10 ब'रे पूरा होने दा एतिहासक दिन ऐ। उनें आखेआ जे मुख्य गी डिजिटल तौर पर सशक्त ते तकनीकी तौर पर उन्नत बनाने आस्तै डिजिटल इंडिया अभियान 10 ब'रे पैहले शुरू कीता गेआ हा। प्रधानमंत्री होरें आखेआ जे इक दहाके मगरा पूरा मुख्य इक ऐसी यात्रा दा गवाह बनेआ ऐ जिसने केई सारे लोकें दे जीवन गी प्रभावत कीता ते सशक्तिकरण दे नमें दौर च शामिल होने च सहायक बनेआ।

<><><><><><>

LG-Yatri Niwas

उपराज्यपाल मनोज सिन्हा होरें पैथा चौक स्थित श्री अमरनाथ जी श्राईन बोर्ड दे यात्री निवास दा उद्घाटन कीता। इत्थें 13 सौ श्रद्धालुएं गी ठैहराने दी बवस्था उपलब्धा ऐ। उनें आखेआ जे यात्री निवास इस गल्ला दा सबूत ऐ जे बाबा बर्फानी दे श्रद्धालुएं गी बेहतर सुविधा उपलब्ध करोआने लेई वचनबद्ध न। उपराज्यपाल होरें बाबा बर्फानी थमां प्रार्थना कीती जे ओ साढ़ी सरजमीन गी शांति, खुशहाली ते समृद्धि बख्शान।

<><><><><><>

CS-NRLM

ग्रामीण महिलाएं गी सशक्त ते आत्म निर्भर बनाने दी दिशा च अगगे बधने दे मकसद कन्नै मुख्ख सचिव अटल डुल्लू होरें जम्मू कश्मीर राष्ट्रीय ग्रामीण आजीविका मिशन तैहत् हासल प्रगति दा जायजा लैता। एहदा मकसद ग्रामीण महिलाएं दा एनआरएलएम तैहत् पंजीकरण करियै उनें गी सशक्त बनाना ते उंदे जीवन च सकारात्मक बदलाव आहनना ऐ ते उनें गी

सफल उद्यमी बनाना ऐ। डुल्लू होरें आखेआ जे ग्रामीण महिलाएं च बड़ा मता समर्थ ऐ ते उनें महिलाएं दा सशक्तिकरण करियै उंदा समाजी तौर पर सशक्तिकरण करने पर जोर पाया। मुख सचिव होरें महिला आप-सहायता समूह दे मिनबरे दे आर्थिक सशक्तिकरण गी बढ़ावा देने लेई किश हिदायतां बी जारी कीतियां।

<><><><><><><>

DGP-SANJY

जम्मू कश्मीर दे डीजीपी नलनी प्रभात होरें दक्खन कश्मीर च पूरी पराती सुरक्षा स्थिति दा जायजा लैने लेई रेंज पुलस मुख्यालय अनंतनाग च इक उच्ची सतह दी सौहगी सुरक्षा समीक्षा बैठक दी अध्यक्षता कीती। जेह्दे च चेचा करियै धसान श्री अमरनाथ जी दी यात्रा पर दित्ता गेआ। बैठक मगरा डीजीपी होरें स्पैशल डीजीपी कोआर्डिनेटर एसजेएम गिलानी आईजीपी सिक्यूरिटी सुजीत कुमार ते होरने वरिष्ठ अफसरें कन्नै रलियै यात्रा आले रस्ते पहलगाम ते आले दोआले दे मुख इलाकें दा व्यापक दौरा कीता। डीजीपी होरें नवयुग ते चन्दनवाड़ी च आधार शिविरें दा मुआयना कीती ते सुरक्षा स्थिति दा जायजा लैता।

<><><><><><><>

SANJY-Lakhanpur

औंदी श्री अमरनाथ जी दी यात्रा गी दिक्खदे होई कठुआ जिला प्रशासन आस्सेआ जम्मू कश्मीर दे प्रवेश द्वार लखनपुर गी केई सारी सुविधाएं कन्नै लैस इक केन्द्र दे तौर पर बदली दित्ता गेआ ऐ। एह केन्द्र ज्हारां बद्धे श्रद्धालुएं दे सुआगत लेई पूरी चाल्ली तैआर ऐ। इत्थें श्रद्धालुएं लेई पंजीकरण केन्द्र, रौहने बौहने दी सुविधा, सेहत दिक्खभाल दे अलावा सांस्कृतिक कार्यक्रम आयोजित करने दी सुविधा बी उपलब्ध ऐ। इत्थें 24 घंटे कम्म करने आला हैल्प डैस्क, आरएफआईडी पंजीकरण दे अलावा सुरक्षा बलें आस्सेआ बहु-स्तरीय सुरक्षा इंतजाम कीते गेदे न।

<><><><><><><>

SANJY Ramban

श्री अमरनाथ जी दी यात्रा लेई जम्मू कश्मीर पुलसै ते सीआरपीएफ ने पूरे रामबन जिले च सुरक्षा इंतजामें सनें बलें दी तैनाती गी होर मता बधाई दित्ता ऐ। रामबन दे एसएसपी

कुलबीर सिंह होरें जानकारी दित्ती ऐ जे श्री अमरनाथ यात्रा ते सैलानिएं दी गड्डिडएं गी दिने 8 बजे थमां पैहले चन्द्रकोट दे अगगे ते 3 बजे दे बाद नवयुग सुरंग दे अगगे जाने दी इजाजत नेई होग। उआं यात्रा दे महत्व गी दिक्खदे होई ते श्रद्धालुएं दी सुरक्षा गी दिक्खदे होई जम्मू कश्मीर पुलिस दे हैल्पलाइन नंबर 24 घैंटे उपलब्ध न।

<><><><><><>

Railway Fair

रेल मंत्रालय नै यात्री रेल सेवाएं दे बुनियादी किराएं च तब्दीली कीती ऐ जेहड़ी अज्जै थमां लागू होग। गैर एसी मेल ते एक्सप्रेस ट्रेनें दे किराएं च 1 पैहा फही किलोमीटर ते एसी क्लास लेई 2 पैहे दी किलोमीटर दा बाद्धा कीता गेआ ऐ। मंत्रालय नै आखेआ ऐ जे इक पास्से दी यात्रा लेइ लोकल ट्रेनें दे किराएं च ते माहवार टिकटें च कोई बाद्धा नेई कीता गेआ ऐ। एहदे अलावा रिसर्वेशन फीस सुपरफास्ट प्रभार ते होरने शुल्कें च कोई बी बदलाव नेई कीता जाग। इस पैहलकदमी दा मकसद रेल किराएं गी युक्तिसंगत बनाना ते यात्री सेवाएं लेई माली स्थिरता गी बेहतर बनाना ऐ।

<><><><><><>

Petition Comm Meeting

जम्मू कश्मीर विधानसभा दी याचिकाएं सरबंधी दी कमेटी नै कल श्रीनगर दे विधानसभा परिसर च इक बैठक सददी ते आवास मैहकमे कन्नै जुड़े दे मुद्दे पर बचार कीता। बैठक दी अध्यक्षता कमेटी दे चेयरमैन पीरजादा फारूक अहमद शाह होरें कीती ते सदस्यें मुश्ताक गुरू, सलमान सागर, मियां मेहर अली, विजय कुमार ते ठाकुर रणधीर सिंह होरें हिस्सा लैता। इस दरान साबका एमएलए गुलाम कादिर वानी हुंदे आस्सेआ छन्नी रामा च इक जिमीं दे मामले पर दर्ज याचिका बारे तफसीली चर्चा कीती गई। चर्चा दरान याचिका च पुट्टे गेदे मसले लेई समेबद्ध तरीके कन्नै हल करने पर जोर दित्ता गेआ।

<><><><><><>